

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ
ՀԱՆՁՆԱԺՈՂՈՎ**

ՈՐՈՇՈՒՄ N 69/27

ք.Երևան

07 սեպտեմբերի 2023թ.

Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով ՀՀ ՊԵԿ իրավաբանական վարչության «վարչական տույժ նշանակելու մասին» 16.08.2023թ. թիվ 238 որոշման դեմ «ԱՐԿՈԼԵՎ» ՍՊԸ-ի (ՀՎՀՀ՝ 01225368) տնօրեն Հրաչյա Մկրտչյանի դիմում-բողոքը՝

ՊԱՐԶԵՑ

1. Բողոքարկման առարկան, դիմում-բողոքով բերված փաստարկները և ներկայացված պահանջները

«ԱՐԿՈԼԵՎ» ՍՊԸ-ի տնօրեն Հրաչյա Մկրտչյանը (այսուհետ նաև՝ բողոքաբեր) հայտնում է, որ ՀՀ ՊԵԿ իրավաբանական վարչությունը իր 16.08.2023թ. «վարչական տույժ նշանակելու մասին» թիվ 238 որոշմամբ (այսուհետ՝ որոշում) վերջինիս՝ «ԱՐԿՈԼԵՎ» ՍՊԸ ընկերության տնօրեն Հրաչյա Ալեքսանի Մկրտչյանին, ճանաչել է զանցառու «Մաքսային կարգավորման մասին» ՀՀ օրենքի 302-րդ հոդվածի 3-րդ մասով (որոշումն ու կից գրությունը կցվում են):

Նշվում է, որ խնդիրը կայանում է նրանում, որ ինչպես նշված է որոշման նկարագրական մասում, «ԱՐԿՈԼԵՎ» ՍՊԸ ընկերությունը, ի պատասխան ՀՀ ՊԵԿ հետբացթողումային հսկողության վարչության 12.06.2023թ. թիվ /9-1/35622-2023 գրության (փոստի դրոշմակնիքի համաձայն ստացվել է 15.06.2023թ.), 23.06.2023թ. թիվ 01/23-ՀՏ գրությամբ ՀՀ ՊԵԿ էլեկտրոնային փոստի հասցեին (secretariat@petekamutner.am) են ուղարկվել պահանջվող փաստաթղթերը, իսկ 29.06.2023թ.-ին, ի լրումն վերը նշված գրությամբ ներկայացված փաստաթղթերի, նույն էլեկտրոնային փոստին է ուղարկվել նաև գրությամբ նշված, սակայն թյուրիմացաբար բաց թողնված փաստաթղթեր: Նշվում է, որ 23.06.2023թ.-ին ուղարկված փոստում պահանջված փաստաթղթերը ներկայացվել են ընկերության պաշտոնական գրությանը կից, իսկ 29.06.2023թ.-ին ուղարկված փոստում նշվել է, որ բաց թողնված փաստաթղթերը ներկայացվում են ի լրումն 23.06.2023թ. գրությամբ ուղարկված փաստաթղթերի, քանի որ նշված գրության մեջ արդեն նշված են եղել թյուրիմացաբար բաց թողնված փաստաթղթերը:

Փաստորեն, ՀՀ ՊԵԿ հետբացթողումային հսկողության վարչության 12.06.2023թ. թիվ /9-1/35622-2023 գրության մեջ նշված ժամկետում (10 աշխատանքային օրվա ընթացքում) ընկերությունը ներկայացրել է գրությամբ պահանջված փաստաթղթերը:

Հետևաբար, բողոքաբերը նշում է, որ բացակայում է վերջինիս կողմից որոշման մեջ նշված «Մաքսային կարգավորման մասին» ՀՀ օրենքի 302-րդ հոդվածի 3-րդ մասով սահմանված խախտումը (անհրաժեշտ փաստաթղթերը և տեղեկությունները մաքսային մարմնի պահանջով չներկայացնելը):

Հաշվի առնելով վերը նշվածը՝ բողոքաբերը խնդրում է կասեցնել ՀՀ ՊԵԿ իրավաբանական վարչությունը իր 16.08.2023թ. «վարչական տույժ նշանակելու մասին» թիվ 238 որոշումը:

2. Դիմում-բողոքի քննության համար էական նշանակություն ունեցող փաստերը

ՀՀ ՊԵԿ իրավաբանական վարչության «վարչական տույժ նշանակելու մասին» 16.08.2023թ. թիվ 238 որոշման մեջ մասնավորապես նշված է, որ Մաքսային հսկողության շրջանակներում ՀՀ ՊԵԿ հետբացթողումային հսկողության վարչության կողմից 12.06.2023 թվականի թիվ /9-1/35622-2023 գրությամբ ապրանքների բացթողումից հետո «ԱՐԿՈԼԵՎ» ՍՊ ընկերությանը ներկայացվել է պահանջ՝ ներկայացնել «ՀԵՂՈՒԿ ԱԾԽԱԶՐԱԾՆԱՅԻՆ ԳԱԶ ԿՈՄՈՒՆԱԼ-ԿԵՆՑԱՂԱՅԻՆ ՕԳՏԱԳՈՐԾՄԱՆ ՀԱՄԱՐ ԵՏ ՄԱԿՆԻՇԻ», «ԱՎՏՈՄԵՔԵՆԱՅԻ ԲԵՆԶԻՆ ԱՈՒ 95, K-5 ԴԱՍԻ», «ՀԵՂՈՒԿ ԱԾԽԱԶՐԱԾՆԱՅԻՆ ԳԱԶ ԱՎՏՈՄՈԲԻԼԱՅԻՆ ՏՐԱՆՍՊՈՐՏԻ ՕԳՏԱԳՈՐԾՄԱՆ ՀԱՄԱՐ ՈԲԱ ՄԱԿՆԻՇԻ» և նման նկարագրություններով ապրանքների արժեքների վերաբերյալ հիմնավորող փաստաթղթեր և (կամ) տեղեկություններ ապրանքների մաքսային արժեքը որոշելու և հայտագրելու ճշտության՝ ապրանքների մաքսային արժեքի որոշելու մեթոդի ընտրության և կիրառության, ապրանքների մաքսային արժեքի կառուցվածքի և մեծության, ապրանքների մաքսային արժեքի մասին տեղեկությունների փաստաթղթային հաստատման, ապրանքների բացթողումից հետո իրականացվող մաքսային և այլ փաստաթղթեր: Տեղեկատվության ներկայացման համար սահմանվել է ժամկետ 10 աշխատանքային օր, սակայն սահմանված ժամկետում պահանջվող տեղեկատվությունը չի ներկայացվել:

Ընկերությունը ծանուցվել է, սակայն չի կատարել մաքսային մարմնի օրինական պահանջը՝ չի ներկայացրել մաքսային հսկողություն իրականացնելու համար ապրանքների վերաբերյալ անհրաժեշտ փաստաթղթերը և տեղեկությունները:

Փաստի առթիվ «ԱՐԿՈԼԵՎ» ՍՊ ընկերության տնօրեն Հրաչյա Ալեքսանի Մկրտչյանի նկատմամբ «Մաքսային կարգավորման մասին» ՀՀ օրենքի 302-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն՝ մաքսային մարմնի պաշտոնատար անձի օրինական պահանջը չկատարելու՝ սահմանված ժամկետում մաքսային հսկողության համար անհրաժեշտ փաստաթղթերը և տեղեկությունները չներկայացնելու համար:

Վարչական վարույթի ընթացքում «ԱՐԿՈԼԵՎ» ՍՊ ընկերության տնօրեն Հրաչյա Ալեքսանի Մկրտչյանը բացատրություն է տվել այն մասին, որ ՀՀ ՊԵԿ հետբացթողումային հսկողության վարչության կողմից 12.06.2023 թվականի թիվ /9-1/35622-2023 գրությանն ի պատասխան «ԱՐԿՈԼԵՎ» ՍՊ ընկերությունը 23.06.2023 թվականի թիվ 01/23-ՀՏ գրությամբ ներկայացրել է ընկերության տրամադրության տակ գտնվող փաստաթղթերն ու տեղեկությունները, իսկ 29.06.2023 թվականին ի լրումն վերը նշված գրությամբ ներկայացրած փաստաթղթերի secretariat@petekamutner.am էլեկտրոնային հասցեին ներկայացրել է նաև լրացուցիչ փաստաթղթեր, որոնք թյուրիմացաբար բաց էին թողնվել: Միաժամանակ որպես ընկերության տնօրեն հեռախոսային զրույց է ունեցել ՀՀ ՊԵԿ հետբացթողումային հսկողության վարչության կողմից ուղարկված 12.06.2023 թվականի թիվ /9-1/35622-2023 գրության կատարող Նոնա Օղլուկյանի հետ, որի ժամանակ նշվել է, որ մաքսային գործում առկա փաստաթղթերի ներկայացումը պարտադիր չէ, քանի որ ՀՀ ՊԵԿ-ը տիրապետում է այդ տեղեկատվությանն ու փաստաթղթերին:

03.08.2023 թվականին հարցում է կատարվել ՀՀ ՊԵԿ հետբացթողումային հսկողության վարչություն ճշտելու արդյոք ՀՀ ՊԵԿ հետբացթողումային հսկողության վարչության 12.06.2023 թվականի թիվ /9-1/35622-2023 գրությանը «ԱՐԿՈԼԵՎ» ՍՊ ընկերությունը սահմանված ժամկետում պատասխան ներկայացրել է, թե՛ ոչ, որին ի պատասխան հայտնվել է, որ «ԱՐԿՈԼԵՎ» ՍՊ ընկերության կողմից 22.07.2023 թվականի թիվ 02/23-ՀՏ գրության մեջ նշված 23.06.2023 թվականի թիվ 01/23-ՀՏ և 29.06.2023 թվականի գրությունները ՀՀ ՊԵԿ հետբացթողումային հսկողության վարչությունը չի ստացել: ՀՀՎ 12.06.2023 թվականի թիվ /9-1/35622-2023 գրությունը մնացել է անպատասխան՝ չեն ներկայացվել նշված գրությամբ պահանջված փաստաթղթերը և տեղեկությունները: Միաժամանակ, Ընկերության վերոհիշյալ գրության 2-րդ պարբերությամբ ներկայացված հեռախոսային զրույցի մասով՝ Ընկերության տնօրենին տեղեկացվել է, որ ՀՀՎ 12.06.2023 թվականի թիվ /9-1/35622-2023 գրությամբ պահանջված փաստաթղթերը ներկայացնելիս կարող են չներկայացվել մաքսային գործում առկա այն փաստաթղթերը, որոնք ներկայացվել են ապրանքները հայտարարագրելիս:

07.08.2023 թվականին հարցում է կատարվել ՀՀ ՊԵԿ քարտուղարություն՝ ճշտելու ՀՀ ՊԵԿ հետբացթողումային հսկողության վարչության կողմից «ԱՐԿՈԼԵՎ» ՍՊ ընկերությանը ուղարկված 12.06.2023 թվականի թիվ /9-1/35622-2023 գրությանն ի պատասխան ՊԵԿ secretariat@petekamutner.am էլեկտրոնային հասցեին ստացվել է «ԱՐԿՈԼԵՎ» ՍՊ ընկերության 23.06.2023 թվականի թիվ 01/23-ՀՏ գրությունը, թե՛ ոչ, եթե՛ այո, ապա երբ է ստացվել այն և որ ստորաբաժանում է ուղարկվել, որին ի պատասխան հայտնվել է, որ «ԱՐԿՈԼԵՎ» ՍՊ ընկերության 23.06.2023 թվականի թիվ 01/23-ՀՏ գրությունը ՀՀ ՊԵԿ secretariat@petekamutner.am պաշտոնական էլեկտրոնային փոստին mkrtchyan.hrachya@gmail.com էլեկտրոնային հասցեից ներկայացվել է ոչ պատշաճ ձևով, այն է՝ առանց համապատասխան ուղեկցական դիմումի: Քարտուղարության աշխատողն ուղարկել է պատասխան հաղորդագրություն և խնդրել է գրել ՀՀ ՊԵԿ-ին ուղղված դիմում և ներկայացնել

ստորագրված: Միաժամանակ դիմումատուին տեղեկացվել է, որ կցված ֆայլերը չեն բացվում: Քարտուղարության աշխատողը նաև բազմիցս հեռախոսազրույց է ունեցել դիմումատուի հետ և բանավոր ևս խնդրել է ուղարկել ստորագրված դիմում և կից ֆայլերը, սակայն դիմումատուն դիմումը և կից ֆայլերը (այլ ձևաչափով) չի ուղարկել:

«Վարչարարության հիմունքների և վարչական վարույթի մասին» ՀՀ օրենքի 43-րդ հոդվածի 1-ին մասի ա) կետի համաձայն՝ անձի և վարչական մարմնի փոխհարաբերություններում ապացուցման պարտականությունը բարենպաստ փաստական հանգամանքների առկայության դեպքում կրում է անձը: Տվյալ դեպքում «ԱՐԿՈԼԵՎ» ՍՊ ընկերության տնօրեն Հրաչյա Ալեքսանի Մկրտչյանի կողմից չի ներկայացվել որևէ ապացույց՝ վերջինիս բացատրությամբ ներկայացվածը հիմնավորելու համար:

«ԱՐԿՈԼԵՎ» ՍՊ ընկերության տնօրեն Հրաչյա Ալեքսանի Մկրտչյանը 2023 թվականի օգոստոսի 16-ին հրավիրվել է ՀՀ ՊԵԿ Իրավաբանական վարչություն՝ իր նկատմամբ «Մաքսային կարգավորման մասին» ՀՀ օրենքի 302-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն «Մաքսային կարգավորման մասին» ՀՀ օրենքի 332-րդ հոդվածի՝ չներկայանալու դեպքում վարչական գործի քննությունը կիրականացվի իր բացակայությամբ, սակայն վերջինս չի ներկայացել:

Այսպիսով, գործի նյութերով պարզվել է, որ «ԱՐԿՈԼԵՎ» ՍՊ ընկերության տնօրեն Հրաչյա Ալեքսանի Մկրտչյանը չի կատարել ՀՀ ՊԵԿ հետբացթողումային հսկողության վարչության 12.06.2023 թվականի թիվ /9-1/35622-2023 գրությամբ ուղարկված մաքսային մարմնի օրինական պահանջը՝ մաքսային հսկողություն իրականացնելու համար սահմանված ժամկետում չի ներկայացրել գրությամբ անհրաժեշտ փաստաթղթերը և տեղեկությունները, այսինքն՝ վերջինս թույլ է տվել «Մաքսային կարգավորման մասին» ՀՀ օրենքի 302-րդ հոդվածի 3-րդ մասով նախատեսված մաքսային կանոնների խախտում, ինչը հիմնավորվում է ՀՀ ՊԵԿ հետբացթողումային հսկողության վարչության 12.06.2023 թվականի թիվ /9-1/35622-2023 և 07.08.2023 թվականի թիվ Ն/9-1/151067-2023 գրություններով, ՀՀ ՊԵԿ քարտուղարության 08.08.2023 թվականի թիվ Ն/1-1.1/152072-2023 գրությամբ, նշված գրության ստացման վերաբերյալ հետադարձ ծանուցմամբ:

«Մաքսային կարգավորման մասին» ՀՀ օրենքի 302-րդ հոդվածի 3-րդ մասի համաձայն մաքսային գործառնություններ կամ մաքսային հսկողություն իրականացնելու համար ապրանքների կամ տրանսպորտային միջոցների վերաբերյալ անհրաժեշտ փաստաթղթերը կամ տեղեկությունները մաքսային մարմնի պահանջով չներկայացնելը՝ անկախ մաքսային հայտարարագիր կամ այլ մաքսային փաստաթուղթ ներկայացնելուց, առաջացնում է տուգանք՝ պաշտոնատար անձանց համար՝ հիսուն հազար դրամի չափով:

Հիմք ընդունելով «Մաքսային կարգավորման մասին» ՀՀ օրենքի 302-րդ, 334-րդ հոդվածները՝ որոշում է կայացվել «ԱՐԿՈԼԵՎ» ՍՊ ընկերության տնօրեն Հրաչյա Ալեքսանի

Մկրտչյանին ճանաչել զանցառու «Մաքսային կարգավորման մասին» ՀՀ օրենքի 302-րդ հոդվածի 3-րդ մասով և նրան տուգանել 50000 ՀՀ դրամ:

3. Բողոքարկման առարկային վերաբերվող իրավական կարգավորումներ և եզրահանգումներ

ԵԱՏՄ մաքսային օրենսգրքի 340-րդ հոդվածի 6-րդ կետի համաձայն՝ հայտարարատուն, (...) և այլ անձինք պարտավոր են մաքսային մարմիններ ներկայացնել մաքսային հսկողության իրականացման համար անհրաժեշտ փաստաթղթերը և (կամ) տեղեկությունները՝ բանավոր, գրավոր և (կամ) էլեկտրոնային տարբերակներով: Օրենսգրքի 84-րդ հոդվածի համաձայն՝ հայտարարատուն պարտավոր է սույն Օրենսգրքով նախատեսված դեպքերում մաքսային մարմին ներկայացնել մաքսային հայտարարագրում ներկայացված տեղեկությունները հաստատող փաստաթղթեր: Հոդվածի 3-րդ կետի համաձայն՝ հայտարարատուն, անդամ պետությունների օրենսդրությանը համապատասխան, պատասխանատվություն է կրում նույն հոդվածի 2-րդ կետով նախատեսված պարտականությունները չկատարելու համար:

«Մաքսային կարգավորման մասին» ՀՀ օրենքի 301-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

«Մաքսային կարգավորման մասին» ՀՀ օրենքի 302-րդ հոդվածի 3-րդ մասի համաձայն մաքսային գործառնություններ կամ մաքսային հսկողություն իրականացնելու համար ապրանքների կամ տրանսպորտային միջոցների վերաբերյալ անհրաժեշտ փաստաթղթերը կամ տեղեկությունները մաքսային մարմնի պահանջով չներկայացնելը՝ անկախ մաքսային հայտարարագիր կամ այլ մաքսային փաստաթուղթ ներկայացնելուց, առաջացնում է տուգանք՝ պաշտոնատար անձանց համար՝ հիսուն հազար դրամի չափով:

Ելնելով վերը նշված իրավանորմերի դրույթներից, հիմք ընդունելով սույն որոշման 2-րդ կետում բերված փաստական տվյալները՝ Հանձնաժողովը գտնում է, որ «ԱՐԿՈԼԵՎ» ՍՊ ընկերության տնօրեն Հրաչյա Ալեքսանի Մկրտչյանի արարքում առկա է «Մաքսային կարգավորման մասին» ՀՀ օրենքի 302-րդ հոդվածի 3-րդ մասով նախատեսված մաքսային կանոնների խախտում և ՀՀ ՊԵԿ իրավաբանական վարչության «վարչական տույժ նշանակելու մասին» 16.08.2023թ. թիվ 238 որոշումը հիմնավոր է և իրավաչափ:

4. Եզրափակիչ մաս

Ելնելով քննության արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը

ՈՐՈՇՈՒՄ Է՝

ՀՀ ՊԵԿ իրավաբանական վարչության «վարչական տույժ նշանակելու մասին» 16.08.2023թ. թիվ 238 որոշման դեմ «ԱՐԿՈԼԵՎ» ՍՊԸ-ի տնօրեն Հրաչյա Մկրտչյանի դիմում-բողոքը մերժել:

Սույն որոշումն ուժի մեջ է մտնում իրազեկելուն հաջորդող օրվանից:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել դատարան:

ՀԱՆՁՆԱԺՈՂՈՎԻ ՆԱԽԱԳԱՀ՝

9/11/2023

X 

ԿԱՐԵՆ ԹԱՄԱԶՅԱՆ

Signed by: TAMAZYAN KAREN 2612840184

ԿԱՐԵՆ ԹԱՄԱԶՅԱՆ